

Cots

I.

Ar vei qu'em vengut als jorns loncs,
qe·il flors s'arengon sobre·ls troncs,
et aug d'auzels chans e refrims
pels plaissatz c'a tengutz enbroncs
lo freitz, mas ar vei sobre·ls cims,
entre las flors e·ls brondels primis,
s'alegron chascuns a lor for.

II.

Mas ieu m'esjauzisc e·m demor
per un joi d'amor q'ai al cor,
don m'es douz desiriers techitz;
que meins que serps de sicamor
me·n partrai per nuills vars fraiditz,
ans m'es totz autres jois oblitz
vas l'amor don paucs bes ajust.

III.

Anc puois N'Adam cuillic del fust
lo fruig don tuich em en tabust
tant bella no·n espiret Crist:
bel cors benestan, car e just,
blanc e lis plus q'us amatist;
tant es yll bella q'ie·n sui trist,
car de mi no·il pren mais de soing.

IV.

E ja mais no·il serai tant loing
que l'amors que m'aflama e·m poing
si mova dal cor ni s'esqins:
mas a las vetz qand si desjoing
s'espandis deforas e dins.
Adones sui cobertz, claus e cins
d'amor plus que de flors ysops.

V.

Et am tant que meins n'a mortz tropis,
e tem que·l jorns me sia props,
c'Amors m'es car'et ieu·l sui vils;
e jes aussi no m'agra ops,
que·l fuocs que m'art es tals que·l Nils

no·l tudaria plus c'us fils
delgatz sostenria una tor.

VI.

Mas ieu sols, las!, sosteing l'ardor
e la pena qe·m ven d'amor
ab doutz desirs, ab mains destrics,
e·m n'espalezis ma color.
Pero non dic que s'er'antics
e blancs devengutz cum es nics,
qu'en re de ma dompna·m clames.

VII.

Car dompnas fant valer ades
lo plus avol, fel et engres:
que tals es francs et agradius
que si ja dompna non ames
vas totas partz fora esquies;
q'ie·n sui als pros plus humelius
e plus orgoillos als savais.

VIII.

Joglars, no·t tenga·l cautz estius:
vai e saluda·m mos amius,
e·N Raimon plus, car el val mais.

IX.

[Que·l mais m'es dous e saborius
e·l pauc ben, mana don me pais.]

- letto 535 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/cots-2>